

四庫全書

集部

欽定四庫全書

竹莊詩話卷六

杜子美下

十二月一日

詩眼云古人律詩亦是一片文章語或似無倫  
次而意若貫珠十二月一日詩云今朝臘月春  
意動雲安縣前江可憐此詩立意念歲月之遷  
易感異鄉之飄泊其曰一聲何處送書鴈百丈

誰家上水船則羈愁旅思皆在目前未將梅蕊  
驚愁眼要取楸花媚遠天梅望春而花楸將夏  
而繁乃言滯留之勢當自冬過春始終見梅楸  
則百花之開落皆在其中矣以此益念故國思  
朝廷故曰光明起草人所羨肺病幾時朝日邊  
聞官軍收河北詩云劍外忽傳收薊北初聞涕  
淚滿衣裳夫人感極則悲悲定而後喜忽聞大  
盜之平喜唐室復見太平顧視妻子知免流離

故曰却看妻子愁何在，其喜之至也。不知手之舞之，足之蹈之，故曰漫展詩書，喜欲狂。從此有樂生之心，故曰白日放歌，須縱酒。於是率中原流寓之人同歸，以青春和暖之時節歸，故曰青春作伴好還鄉。言其道塗則曰欲從巴峽穿巫峽，言其所歸則曰便下襄陽向洛陽。此蓋曲盡一時之意，愜當衆人之情，通暢而有條理。如辨士之語言也。游子詩六，巴蜀愁誰語，吳門興杳。

然巴蜀既無可語言故欲遠之吳會九江春草  
外則想像將來吳門之景物三峽暮帆前則去  
路先涉三峽之風波厭就成都卜休為吏部眠  
君平之卜所以養生畢卓之酒所以忘憂今皆  
不能如意則犯三峽之險適九江之遠豈得已  
也哉夫奔走萬里無所稅駕傷人世險隘不能  
容已故曰蓬萊如可到衰白問羣仙終焉題桃  
樹詩云小徑升堂舊不斜五株桃樹亦從遮此

詩意在第一句舊堂小徑從來不斜又五桃遮  
掩之已若圖畫矣中間四句皆舊日方天下太  
平家給食足有桃實則餽貧人故曰高秋總餽  
貧人實和氣應期而至人意閒而樂之故曰來  
歲還舒滿樹花家家有忠厚之風處處有魯恭  
之化故曰窓戶每宜通乳鷺兒童莫信打慈鴟  
及題此詩時所向皆寡妻羣盜何暇如此故曰  
非今日乃往年天下車書正一家時也然所謂

意若貫珠令人不意思關紐但以相似語言  
為貫穿以停穩筆畫為端直豈不淺近也哉

今朝臘月春意動雲安縣前江可憐一聲何處送書鴈  
百丈誰家上水船未將梅蘂驚愁眼更取楸花媚遠天  
明光起草人所羨肺病幾時朝日邊

聞官軍收河南河北

劍外忽傳收薊北初聞涕淚滿衣裳却看妻子愁何在  
漫卷詩書喜欲狂白日放歌須縱酒青春作伴好還鄉

即從巴峽穿巫峽便下襄陽向洛陽

遊子

巴蜀愁誰語吳門興杳然九江春草外三峽暮帆前  
厭就成都卜休為吏部眠蓬萊如可到衰白問羣仙

題桃樹

小徑升堂舊不斜五株桃樹亦從遮高秋總餽貧人實  
來歲還舒滿樹花簾戶每宜通乳燕兒童莫信打慈鴉  
寡妻羣盜非今日天下車書正一家



哀江頭

蘇子由云大雅繇九章誦太王遷豳建都邑營  
宮室而已至其八章迺曰肆不殄厥愠亦不隕  
厥問始及昆夷之怒上何也至其九章迺曰虞  
芮質厥成文王蹶厥生予曰有疏附予曰有先  
後予曰有奔奏予曰有禦侮事不接文不屬如  
連川斷嶺雖相去絕遠而氣象聯絡觀者知其  
脈理之為一也蓋附離不以鑿枘此最為文之

高致耳老杜陷賊時有哀江頭詩予愛其詞氣  
如百金戰馬注坡驀澗如履平地得詩人之遺  
法如白樂天詩詞甚工然拙於紀事寸步不遺  
猶恐失之此所以望老杜之藩垣而不及也

少陵野老吞聲哭春日潛行曲江曲江頭宮殿鎖千門  
細柳新蒲為誰綠憶昔霓旌下南苑苑中萬物生顏色  
昭陽殿裏第一人同輦隨君侍君側輦前才人帶弓箭  
白馬嚼齧黃金勒翻身向天仰射雲一箭正墜雙飛翼

明眸皓齒今何在血汗遊魂歸不得清渭東流劍閣深  
去住彼此無消息人生有情淚沾臆江水江花豈終極  
黃昏胡騎塵滿城欲往城南忘南北

兵車行

蔡寬夫詩話云齊梁以來文士喜為樂府辭然  
沿襲之久往往失其命題本意烏將八九子但  
詠烏雉朝飛但詠雉雞鳴高樹顛但詠雞大抵  
類此而甚有併其題失之者如相府蓮訛為想

夫憐如楊婆兒訛為楊叛兒之類是也蓋辭人  
例多事語言不復詳研考雖李白亦不免此惟  
老杜兵車行悲青坂無家別見前等數篇皆因事

自出己意立題略不更蹈前人陳迹直豪傑也

車鞞鞞馬蕭蕭行人弓箭各在腰  
命娘妻子走相送塵埃不見咸陽橋  
牽衣頓足攔道哭哭聲直上千雲霄  
道旁過者問行人行人但云點行頻  
或從十五北防河便至四十西營田  
去時里正與裏頭歸來頭白還戍邊

庭流血成海水武皇開邊意未已君不見漢家山東二  
百州千村萬落生荆杞縱有健婦把鋤犁禾生隴畝無  
東西況復秦兵耐苦戰被驅不異犬與雞長者雖有問  
役夫敢伸恨且如今年冬未休關西卒縣官急索租租  
稅從何出信知生男惡反是生女好生女猶是嫁比鄰  
生男埋沒隨百草君不見青海頭古來白骨無人收新  
鬼煩冤舊鬼哭天陰雨濕聲啾啾

悲青坂

我軍青坂在東門天寒飲馬太白窟黃頭奚兒日尚西  
數騎彎弓敢馳突山雪河冰野蕭瑟青是烽煙白人骨  
焉得附書與我軍忍待明年莫倉卒

後出塞

許彥周詩話云詩有力量如弓之斗力其未挽  
時不知其難也及其挽之力不及處分寸不可  
強若出塞曲落日照大旗馬鳴風蕭蕭悲茹數  
聲動壯士慘不驕又八哀詩汝陽讓太子眉宇

真天人虬髯似太宗色映塞外春後見此等力  
量不容它人到

朝進東門營暮上河陽橋落日照大旗馬鳴風蕭蕭平  
沙列萬幕部伍各見招中天懸明月令嚴夜寂寥悲茄  
數聲動壯士慘不驕借問大將誰恐是霍嫖姚

八哀詩

傷時盜賊未息興起王公李公歎舊懷賢終于張  
相國八公前後存沒遂不詮次焉

少陵詩總目云八哀詩古風中最高大筆崔德  
符嘗論斯文可以表裏雅頌中古作者莫及也

贈司空王公思禮

司空出東夷童稚刷勁翮追隨燕薊兒穎銳物不隔服  
事哥舒翰意無流沙磧未甚拔行間犬戎大充斥短小  
精悍姿屹然強寇敵貫穿百萬衆出入由咫尺馬鞍懸  
將首甲外控鳴鏑洗劍青海水刻銘天山石九曲非外  
蕃其王轉深壁飛兔不近駕鷙鳥資遠擊曉達兵家流



飽聞春秋癖宵襟日沉靜肅肅自有適潼關初潰散萬  
乘猶辟易偏裨無所施元帥見手格太子入朔方至尊  
狩梁益胡馬纏伊落中原氣甚逆肅宗登寶位塞望勢  
敦迫公時徒步至請罪將厚責際會清河公間道傳玉  
冊天王拜跪畢讜議果永釋翠華卷飛雪熊虎亘阡陌  
屯兵鳳凰山帳殿涇渭關金城賊咽喉詔鎮雄所搃禁  
暴靖無雙爽氣春浙瀝卷有從公歌野多青青麥及夫  
哭廟後復領太原役恐懼祿位高悵望王土窄不得見

清時嗚呼就寔宥永繫五湖舟悲甚田橫客千秋汾晉  
間事與雲水白昔觀文苑傳宣述廉藺績嗟嗟鄧大夫  
士卒終倒戟

故司徒李公光弼

司馬天寶末北收晉陽甲胡騎攻吾城愁寂意不愜人  
安若泰山薊北斷右脅朔方氣乃蘇黎首見帝業二宮  
泣四郊九廟起頽壓未散河陽卒思明僞臣妾復自碣  
石來火焚乾坤獵高視笑祿山公又大獻捷異王冊崇

勲小敵信所怯擁兵鎮河汴千里初安帖青繩紛營營  
風雨秋一葉內省未入朝死淚終映睫大屋去高棟長  
城掃遺堞平生白羽扇零落蛟龍匣雅望與英姿惻愴  
槐里接三軍晦光彩烈士痛稠疊直筆在史臣將來洗  
箱篋吾思哭孤冢南紀阻歸楫扶顛永蕭條未濟失利  
涉疲藹竟何人灑涕巴東峽

贈左僕射鄭國公嚴公武

鄭公瑚璉器華岳金天晶昔在童子日已聞老成名嶷

然大賢後復見秀骨清開口取將相小心事友生閱書  
百氏盡落筆四座驚歷職匪父任嫉邪常力爭漢儀尚  
整肅胡騎忽縱橫飛傳自河隴逢人問公卿不知萬乘  
出雪涕風悲鳴受詞劍閣道謁帝蕭關城寂寞雲臺仗  
飄飄沙塞旌江山少使者笳鼓凝皇情壯士血相視忠  
臣氣不平密論正觀體揮發岐陽征感激動四極聯翩  
收二京西郊牛酒再原廟丹青明匡汲俄寵辱衛霍竟哀  
榮四登會府地三掌華陽兵京兆空柳色尚書無履聲

羣鳥自朝夕白馬休橫行諸葛蜀人愛文翁儒化成公  
來雪山重公去雪山輕記室得何遜韜鈴延子荆四郊  
失壁壘虛館開逢迎堂上指圖畫軍中吹玉笙豈無成  
都酒憂國只細傾時觀錦水釣問俗終相并意待犬戎  
滅人葳紅粟盈以茲報主願庶或裨世程炯炯一心在  
沉沉二豎嬰顏回竟短折賈誼徒忠貞飛旒出江漢孤  
舟轉荆衡虛無馬融笛帳望龍驤瑩空餘老賓客身上

媿簪纓

贈太子太師汝陽郡王璿

汝陽讓太子眉宇真天人虬髯似太宗色映塞外春往  
者開元中主恩視遇頻出入獨非時禮異見羣臣愛其  
謹潔極倍此骨肉親從容聽朝後或在風雪晨忽思格  
猛獸苑囿騰清塵羽旗動若一萬馬肅駘駘詔王來射  
鴈拜命已挺身箭出飛鞞內上又回翠麟翻然紫塞翻  
下拂明月輪從人雖獲多天笑不為新王每中一物手  
自與金銀袖中諫獵書扣馬久上陳竟無銜檠虞聖聰

矧多仁官免供給費水有在藻鱗匪唯帝老大皆是王  
中勤晚年務置醴門引申白賓道大容無能永懷侍芳  
茵好學尚真烈義形必霑巾揮翰綺綉揚篇什若有神  
川廣不可泝墓久狐兔隣宛彼漢中郡文雅見天倫何  
以開我悲泛舟俱遠津温温昔風味少壯已書紳舊遊  
易磨滅衰謝多酸辛

贈秘書監江夏李公邕

長嘯宇宙間高才日陵替古人不可見前輩復誰繼憶

昔李公存詞林有根柢聲華當健筆灑落富清製風流  
散金石追琢山岳銳情窮造物理學貫天人際予謁走  
其門碑版照四裔各滿深望還森然起凡例蕭蕭白楊  
路洞徹寶珠惠龍宮塔廟湧浩劫浮雲衛宗儒俎豆事  
故吏去思計眇眇已皆虛跋跬曾不沉向來映當時豈  
獨勸後世豐屋珊瑚鈎麒麟織成罽紫騮隨劍几義取  
無虛歲分宅脫驂間感激懷未濟衆歸賙給美擺落多  
歲穢獨步四十年風聽九臯唳嗚呼江夏姿竟掩宣尼



袂往者武后朝引用多寵嬖否臧太常議面折二張勢  
衰俗凜生風排蕩秋旻霽忠貞負寃根官闕深旒綴放  
逐早聯翩低垂困炎厲日斜鵬鳥入魂斷蒼梧帝榮枯  
走不暇星駕無安稅幾分漢庭竹夙擁文侯篲終悲洛  
陽獄事近小臣斃禍階初負謗易力何深濟伊昔臨淄  
亭酒酣託末契重叔東都別朝陰改軒砌論文到崔蘇  
指盡流水逝近伏盈川雄未甘特進麗是非張相國相  
扼一危脆爭名豈古然關捷歛不閉例及吾家詩曠懷

掃氛翳慷慨嗣真作咨嗟玉山桂鍾律儼高懸鯤鯨噴  
迢遰坡陀青州血蕪沒汝陽瘞哀贈竟蕭條恩波延揭  
厲子孫存如綫舊客舟凝滯君臣尚論兵將帥接燕薊  
朗詠六公篇憂來豁蒙蔽

故秘書少監武功蘇公源明

武功少也孤徒步客徐充讀書東岳中十載考墳典時  
下萊蕪郭忍饑浮雲嘯負米晚為身每食臉必泣夜字  
照蕪薪垢衣生碧蘚庶以勤苦志報茲劬勞願學蔚醇

儒姿文包舊史善灑落辭幽人歸來潛京輦射策君東  
堂宗匠集精選制可題未乾乙科已大闡文章日自負  
掾吏亦累踐晨趨閭闔內足踏宿昔趺一麾出守還黃  
屋朔風卷不暇陪八駿虜庭悲所遣平生滿樽酒斷  
此朋知展憂憤病二秋有恨石可轉肅宗復社  
稷得無逆順辨范曄顧其兒李斯憶黃犬秘書茂松  
色載從祠壇墀前後百卷文枕藉皆禁鬻篆刻揚雄  
流溟漲本末淺青熒芙蓉劍犀兕豈獨刺反為後輩

藜子實苦懷緬煌煌齋房芝事絕萬手拳垂之俟來者  
正始徵勸勉不要懸黃金胡為投亂贊結交三十載吾  
與誰遊衍滎陽復冥漠罪罟已橫罨嗚呼子逝日始泰  
則終蹇長安米萬錢凋喪盡餘喘戰伐何當解歸帆阻  
清沔尚纏漳水疾永負蒿里餞

故著作郎貶台州司戶滎陽鄭公虔

鷄鳴至魯門不識鍾鼓響孔翠望赤霄愁思雕籠養滎  
陽冠衆儒早聞名公賞地崇士大夫況乃氣清爽天然

生知姿學立游夏上神農或闕漏黃石愧師長藥纂西  
極名兵流指諸掌貫穿無遺恨蒼葢何技癢圭臬星經  
輿蟲篆丹青廣子雲窺未遍方朔諧太枉神翰顧不一  
體變鍾兼兩文傳天下口大字猶在榜昔獻書畫圖新  
詩亦俱往滄洲動玉陛寡鶴誤一響三絕自御題四方  
尤所仰嗜酒益疎放彈琴視天壤形骸實土木親近惟  
几杖未曾寄官曹突兀倚書幌晚就芸香閣風塵昏坱  
莽反覆歸聖朝點染無滌蕩老蒙台州掾泛泛浙江漿

履穿四明雪饑拾楮溪椽空聞紫芝歌不見杏壇大天  
長眺東南秋色餘翹翹別離慘至今斑白徒懷曩春深  
泰山秀葉墜清渭朗劇談王侯門野稅林下鞅操紙終  
夕酣時物集遐想詞場竟踈濶平昔濫吹獎百年見存  
沒牢落吾安放蕭條阮咸在出處同世網他日訪江樓  
含淒迷飄蕩

故右僕射相國張公九齡

相國生南紀金璞無留礦仙鶴下人間獨立霜毛整矯

然江海思復與雲路永寂寞想土階未遑等箕穎上君  
白玉堂倚君金華省碣石歲崢嶸天地日蛙黽退食吟  
大庭何心記榛梗骨驚畏曩哲鬢變負人境雖蒙換蟬  
冠右地慙多幸敢忘二疏歸痛迫蘇耽井紫綬映暮年  
荊州謝所領庾公興不淺黃霸鎮每靜賓客引調同諷  
詠在務屏詩罷地有餘篇終語清省一陽發陰管淑氣  
含公鼎乃知君子心用才文章境散帙起翠螭倚薄巫  
廬並綺麗玄暉擁牋誅任昉騁自我一家則未缺隻字

警千秋滄海南名繫朱鳥影歸老守故林戀闕悄延頸  
波濤良史筆蕪絕大庾嶺向時禮數隔制作難上請再  
讀徐孺碑猶思理煙艇

冬日洛城北謁玄元皇帝廟

珊瑚鈎詩話云陳無已先生語予曰今人愛  
杜甫詩一句之內至切取數字以髣像之非  
善學者學詩之要在乎立格命意用字而已  
予曰如何等是曰冬日謁玄元皇帝廟詩叙



述功德反復外意事該而理長閨中歌辭致峭  
麗語脈新奇句清而體好茲非立格之妙乎  
江漢詩言乾坤之大腐儒無所寄其身縛雞  
行言雞蟲行失不如兩忘而寓於道茲非命  
意之深乎贈蔡希魯詩云身輕一鳥過力在  
一過字徐步詩云花藥上蜂鬚功在一上字  
茲非用字之精乎學者體其格高其意練其  
字則自然有合矣何必規規然髣像之乎

配極玄都闕憑高禁禦長宗祧嚴具禮掌節鎮非常碧  
瓦初寒外金莖一氣旁山河扶繡戶日月近雕梁仙李  
盤根大猗蘭奕葉光世家遺舊史道德付今王畫手看  
前輩吳生遠擅場森羅移地軸妙絕動宮牆五聖聯龍  
袞千官列鴈行冕旒俱秀發旌旆盡飛揚翠栢深留景  
紅梨迥得霜風箏吹玉桂露井凍銀床身退卑周室經  
傳拱漢皇谷神如不死養拙更何鄉

閬山歌

閬州城東靈山白  
閬州城北玉臺碧  
松浮欲盡不盡雲  
山動將崩已崩石  
那知根無鬼神會  
已覺氣與嵩華敵  
中原格鬪且未歸  
應結茅齋看青壁

閬水歌

嘉陵江色何所似  
石黛碧玉相因依  
正憐日破浪花出  
更復春從沙際歸  
巴童蕩漿歌側過  
水雞銜魚來去飛  
閬中勝事可腸斷  
閬州城南天下稀

江漢

江漢思歸客乾坤一腐儒片雲天共遠永夜月同孤落  
日心猶壯秋風病欲蘇古來存老馬不必取長途

縛雞行

小奴縛雞向市賣雞被縛急相喧爭家中厭雞食蟲蟻  
不知雞賣還遭烹蟲雞於人何厚薄吾叱奴人解其縛  
雞蟲得失無了時注目寒江倚山閣

登岳陽樓

唐子西語錄云過岳陽樓觀子美詩不過四十

字耳氣象宏放涵蓄深遠殆與洞庭爭雄所謂  
富哉言乎者太白退之輩率為大篇極其筆力  
終不逮也杜詩雖小而大餘詩雖大而小

西清詩話云洞庭天下壯觀自昔騷人墨客題  
之者衆矣如水涵天影濶山拔地形高四顧疑  
無地中流忽有山鳥飛應畏墮帆遠却如閒皆  
見稱於世未若孟浩然氣蒸雲夢澤波撼岳陽  
城則洞庭空曠無際氣象雄壯如在目前至子

美詩則又不然吳楚東南圻乾坤日夜浮不  
知少陵胷中吞幾雲夢也

昔聞洞庭水今上岳陽樓吳楚東南圻乾坤日夜浮親  
朋無一字老病有孤舟戎馬關山北憑軒涕泗流

野人送朱櫻

詩眼云櫻桃詩云云前四句此詩如禪家所謂信

手拈來頭頭是道者直書目前所見平易委曲  
得人心所同然但它人難難不能發爾至於云

云後四句其感興皆出於自然故終篇道健

西蜀櫻桃也自紅野人相贈滿筠籠數回細寫愁仍破  
萬顆勻圓訝許同憶昨賜霑門下省退朝擎出大明宮  
金盤玉筋無消息此日嘗新任轉蓬

秋雨歎

苔溪漁隱云秋雨歎三篇一二篇尤感慨

雨中百草皆爛死堦下決明顏色鮮著葉滿枝翠羽蓋  
開花無數黃金錢涼風蕭蕭吹汝急恐汝後時難獨立

堂上書生空白頭  
臨風三嗅馨香泣

春望

迂叟詩話云牂羊墳首三星在  
畱言不可久古  
人為詩貴於意在言外使人思而得之  
故言之  
者無罪聞之者足以戒也近世詩人  
惟杜子美  
最得詩人之體如山河在明無餘物  
矣草木深  
明無人矣花鳥平時可娛之物見之  
而泣聞之  
而恐則時可知矣他皆類此不可徧舉



國破山河在城春草木深感時花濺淚恨別鳥驚心烽  
火連三月家書抵萬金白頭搔更短渾欲不勝簪

壯遊

碧溪詩話云書史蓄胸中而氣味入於冠裾山  
川歷目前而英靈助於文字太史公南遊北涉  
信非徒然觀老杜壯遊云東下姑蘇臺至西歸  
到咸陽其豪氣逸韻可以想見序太白集者稱  
其隱岷山居襄漢南遊江淮觀雲夢去之齊魯

之吳之梁北抵趙魏燕晉西徙邠岐金陵上  
潯陽流夜郎泛洞庭上巫峽白自序亦自偶  
乘舟一日千里或遇勝景終年不移其恣橫  
採覽非其狂也使二公穩坐中書何以垂不  
朽如此哉燕公助於江山鄭絜謂相府非灞  
橋那得詩思非虛語也

往昔十四五出遊翰墨場斯文崔魏徒以我似班揚七  
齡思即壯開口詠鳳皇九齡書大字有作成一囊性豪

業嗜酒嫉惡懷剛腸脫略小時輩結交皆老蒼飲酣嗜  
八極俗物都茫茫東下姑蘇臺已具浮海航到今有遺  
恨不得窮扶桑王謝風流遠闔廬邱墓荒劍池石壁仄  
長洲芰荷香嗟峨閭門北清廟映迴塘每趨吳太伯撫  
事淚浪浪枕戈憶勾踐渡浙想秦皇蒸魚聞匕首除道  
哂要章越女天下白鏡湖五月涼剡溪蘊秀異欲罷不  
能忘歸帆拂天姥中歲貢舊鄉氣劇屈賈壘目短曹劉  
牆忤下考工第獨辭京尹堂放蕩齊趙間裘馬頗清狂

春歌叢臺下冬獵青丘旁呼鷹皂攄林逐獸雲雪罔射  
飛曾縱鞚引臂落鵝鶻蘇侯據鞍喜忽如攜葛疆快意  
八九年西歸到咸陽許與必詞伯賞遊實賢王曳裙置  
醴地奏賦入明光天子廢食名羣公會軒裳脫身無所  
愛痛飲信行藏黑貂不免敝班鬢兀稱觴杜曲晚耆舊  
四郊多白楊坐深鄉黨敬日覺死生忙朱門任傾奪赤  
族迭罹殃國馬竭粟豆官雞輸稻梁舉隅見煩費引古  
惜興亡河朔風塵起岷山行幸長兩宮各警蹕萬里遙

相望崆峒殺氣黑少海旌旗黃禹功亦命子涿鹿親戎  
行翠葉擁吳岳螭虎噉豺狼爪牙一不中驕兵更陸梁  
大軍載草草凋瘵滿膏盲備員竊補袞憂憤心飛揚上  
感九廟焚下憫萬民瘡斯時伏青蒲廷諍守御床君辱  
敢愛死赫怒幸無傷聖哲體仁恕宇縣復小康哭廟灰  
燼中鼻酸朝未央小臣議論絕老病家殊方鬱鬱苦不  
展羽翮困低昂秋風動哀壑碧蕙捐微芳之推避賞從  
漁父濯滄浪榮華敵勳業歲暮有嚴霜吾觀鳴夷子才

格出尋常羣兇逆未定側佇英後翔

玉華宮

容齋隨筆云張文潛暮年在宛邱何大圭方弱冠住謁之凡三日見其吟哦此詩不絕口大圭請其故曰此章乃風雅鼓吹未易為子言大圭曰先生所賦何必減此曰平生極力模寫僅有一篇稍似之然未可同日語遂誦其離黃州詩偶同此韻曰扁舟發孤城揮手謝送者山回地

勢卷天豁江面瀉中流望赤壁石脚插天下昏  
昏煙霧嶺歷歷渙樵舍居夷實三載鄰里通  
假借別之豈無情老淚為一洒篙工起鳴鼓  
輕櫓健於馬聊為過江宿寂寂樊山夜此其  
音響節奏固似之矣讀之可默喻也

溪迴松風長蒼鼠竄古瓦不知何王殿遺構絕壁下陰  
房鬼火青壞道哀湍瀉萬籟真笙竽秋色正瀟灑美人  
為黃土況乃粉黛假當時侍金輿故物獨石馬憂來藉

草坐浩歌淚盈把冉冉征途間誰是長年者

嚴鄭公宅詠竹

王洙詩注云此詩公之措意極為深遠以意  
逆志觀者當自知之

綠竹半含箨新梢纔出牆色侵書帙晚陰過酒樽涼雨  
洗娟娟靜風吹細細香但令無翦伐會見拂雲長

孤鴈

師先生詩注云鮑當孤鴈詩云更無聲接續



空有影相隨孤則孤矣豈若子美有飲啄念羣  
之語孤之中乃有不孤之意而誰憐一片影相  
失萬重雲又有不盡之意乎

孤鴈不飲啄飛鳴聲念羣誰憐一片影相失萬重雲望  
盡似猶見哀多如更聞野鴟無意緒鳴噪自紛紛

絕句謾興九首

張文潛云以聲律作詩其末流也而自唐至今  
詩人謹守之獨魯直一掃古今出曾臆破棄聲

律作五七言如金石未作鐘磬聲和渾然有律  
呂外意近來作詩者頗有此體然自吾魯直始  
也茗溪漁隱曰古詩不拘聲律自唐至今詩人  
皆然初不待破棄聲律詩破棄聲律老杜自有  
此體如絕句漫興黃河江畔獨步尋花夔州歌  
春水生皆不拘聲律渾然成章新奇可愛

眼見客愁愁不醒無賴春色到江亭即遣花開深造次  
便覺鶯語太丁寧

手種桃李非無主  
野老牆低還是家  
恰似春風相欺得  
夜來吹折幾枝花

孰知茅齋絕低小  
江上鶯子故來頻  
銜泥點汙琴書內  
更接飛蟲把著人

二月已破三月來  
漸老逢春能幾回  
莫思身外無窮事  
且盡生前有限盃

腸斷春江欲盡頭  
杖藜徐步立芳洲  
顛狂柳絮隨風去  
輕薄桃花逐水流

懶慢無堪不出村  
呼兒自在掩柴門  
蒼苔濁酒林中靜  
碧水春風野外昏

糝暹楊花鋪白蘊  
點溪荷葉疊青錢  
筍根稚子無人見  
沙上鳧雛旁母眠

舍西柔桑葉可拈  
江上細麥復纖纖  
人生幾何春已夏  
不放香醪如蜜甜

隔戶楊柳弱嫋嫋  
恰似十五兒女腰  
誰謂朝來不作意  
狂風挽斷數長條

黃河二首

黃河北岸海西軍  
搥鼓鳴鐘天下聞  
鐵馬長鳴不知數  
羌人高鼻動成羣

黃河西岸是吾蜀  
欲須供給家無粟  
願驅衆庶戴君王  
混一車書棄金玉

江畔獨步尋花 七絕句

禁巒云古詩有醇醖之氣  
江畔獨步尋花七

絕句云云

峽門江腹擁城隅

武侯祠堂不可忘中有松柏參天長  
千戈滿地客愁破  
雲日如火炎天涼

春水生

二絕句

二月六夜春水生門前小灘渾欲平  
鷓鴣鶻鵲莫漫喜  
吾與汝曹俱眼明

一夜水高二尺強數日不可更禁當  
南市津頭有船賣  
無錢即買繫籬傍



竹莊詩話卷六

欽定四庫全書

集部

竹莊詩話卷七至十

詳校官監察御史臣劉人寰

主事銜臣徐以坤覆勘

總校官知縣臣繆琪

校對官主事臣陳壩

謄錄監生臣王思誦



欽定四庫全書

竹莊詩話卷七

韓退之上

秋懷詩

十一首

樊汝霖云秋懷詩十一首文選體也唐人最重  
文選學公以六經之文為諸儒倡文選弗論也  
而公詩如自許連城價傍砌看紅藥眼穿長訝  
雙魚斷之句皆取諸文選此詩亦往往有其體

窻前兩好樹，衆葉光疑疑。秋風一披拂，策策鳴不已。微燈照空床，夜半偏入耳。秋憂無端來，感歎成坐起。天明

視顏色，與故不相似。羲和驅日月，

一作白日

疾急不可恃。浮

生雖多途，

雖或作每

趨死惟一軌。胡為浪自苦，得酒且歡喜。

白露下百草，蕭蕭蘭共雕。悴青青四牆，下已復生滿地寒。蟬暫寂寞，蟋蟀鳴自恣。運行無窮期，稟受氣苦異。適時各得所，松柏不必貴。

彼時何卒卒，我志何曼曼。犀首空好飲，廉頗尚能飭。學

堂日無事驅馬適所願茫茫出門路欲去聊自勸歸還  
閱書史文字浩千萬塵迹竟誰尋賤嗜非貴獻丈夫意  
有在女子乃多怨

秋氣日惻惻秋空日凌凌上無枝上蝸下無盤中蠅豈  
不感時節耳目去所憎清曉卷書坐南山見高稜其下  
澄秋水有蛟寒可冒惜哉不得往豈謂吾無能

離離掛空悲戚戚抱虛警露泣秋樹高蟲弔寒夜永斂  
退就新懦趨營悼前猛歸愚識夷途汲古得脩綆名浮

猶有恥味薄真自幸庶幾遺悔尤即此是幽屏

露泣一作露滴

今晨不成起端坐盡日景蟲鳴室幽幽月吐窻同同喪  
懷若迷方浮念劇舍梗塵埃慵伺候文字浪馳騁尚須  
勉其頑王事有朝請

秋夜不可晨秋日苦易暗我無汲汲志何以有此憾寒  
雞空在棲缺月煩屢瞰有琴具徽絃再鼓聽愈淡古聲  
久埋滅無由見真濫低心逐時趣苦勉祇能暫有如乘  
風船一縱不可纜不如覩文字丹鉛事點勘豈必求羸

餘所要石與甌

卷卷落地葉隨風走前軒鳴聲若有意顛倒相追奔空  
堂黃昏暮我坐默不言童子自外至吹燈當我前問我  
我不應饋我我不餐退坐西壁下讀詩一作書盡數篇作  
者非今士相去時已千其言有感激使我復悽酸顧謂  
汝童子置書且安眠丈夫屬有念事業無窮年

霜風侵梧桐衆葉著樹乾空堦一片下瑩若摧琅玕謂  
是夜氣滅望舒實其團青冥無依倚飛轍危難安驚起

出戶視倚楹久汎瀾憂愁費晷景日月如跳丸迷復不  
計遠為君駐塵鞍

暮暗來客去羣鷺各收聲悠悠偃宵寂疊疊抱秋明世  
累忽進慮外憂遂侵誠強懷張不滿弱念缺易一作盈

詰屈避語寔冥茫觸心兵敗虞千金棄得比寸草榮知  
恥足為勇晏然誰汝令

鮮鮮霜中菊既晚何用好揚揚弄芳蝶爾生還不早運  
窮兩值遇婉孌死相保西風螫龍蛇衆木日凋槁由來

命分爾泯滅豈足道

贈一有別字

元十八協律

六首

知識久去眼吾行其既遠曹曹莫此言省一作默默但寢

飯子兮何為者冠珮立憲憲何氏之從學蘭蕙已滿畹

於何翫其光以至歲向晚時治

一作治惟

尚和同無俟於蹇

蹇或師絕學賢不以藝自輓子兮獨如何能自媚婉婉

一作婉

金石出聲音宮室發關鍵何人識章甫而知駿蹄踠

惜乎吾無居不得留息偃臨當背面時裁詩示繆繆

英英桂林伯實維文武特遠勞從事賢來弔逐臣色南  
裔多山海道里屢紆直風波無程期所憂動不測子往

誠艱難

一作險

我去未窮極臨別且無言有淚不可拭

吾友柳子厚其人藝且賢吾未識子時已覽贈子篇  
寤寐想風彩於今已三年不意流竄路旬日同食眠  
所聞昔已多所得今過前如何又須別使我抱悁悁  
勢要情所重排斥則埃塵骨肉未免然況又四海人  
疑疑桂林伯矯矯勇義身生平所未識待我逾交親



遺我數幅書繼以藥物珍藥物防瘴癘書勸養形神  
不知四罪地豈有再起辰窮塗致感激肝膽還輪困  
讀書患不多思義患不明患足己不學既學患不行子  
今四美具實大華亦榮王官不可闕未宜後諸生嗟我  
擯南海無由助飛鳴

寄書龍城守君驥何時秣峽山逢颶風雷電助撞梓乘  
潮簸扶胥近岸指一髮兩岩雖云牢木石互飛發屯門  
雖云高亦映波浪沒余罪不足惜子生未宜忽胡為不

忍別感謝情至骨

南溪始泛 三首

蔡寬夫詩云南溪始泛三首乃末年所作獨為閒遠有淵明風氣

王直方詩話云洪龜父言山谷於退之詩少所許可最愛南溪始泛以為有詩人句律之深意

榜舟南溪上 一作下 上上不得反幽尋事隨去孰能量近

遠陰沈過連樹藏昂抵橫坂石麤肆磨礪波惡厭牽挽或

以偏岸漁竟就平洲  
飮點點暮雨飄稍稍  
新月偃餘年

諒

一作慄

無幾休日愴已晚  
自是病使然非由取高蹇

南溪亦清駛而無楫  
與舟山農驚見之隨我觀不休不

惟兒童輩或有杖白頭  
饋我籠中瓜勸我此淹留我云

以病歸此已頗自由  
幸有用餘俸

一作今幸有餘俸

置居在西

疇困倉米穀滿未有旦夕憂  
上去無得得下來亦悠悠

但恐煩里閭時有緩急  
投願為同社人雞豚燕春秋

足弱不能步自宜收朝迹  
羸形可與

一作與

致佳觀安可

擲卽此南坂下久聞有水石拖舟入其間溪流正清激  
隨波吾未能峻瀨乍可刺鷺起若道吾前飛數十尺亭  
亭柳帶沙團團冠松壁歸時還盡夜誰謂非事役

此日足可惜贈張籍

歐公詩話云退之才力無施不可以為為文章末  
事其詩曰多情懷酒伴餘事作詩人然其發談笑  
助諧謔叙人情狀物態一寓於詩而曲盡其妙此  
在雄文大手固不足言而余獨愛其工於用韻蓋

得韻寬則波瀾橫溢泛入傍韻合離出入回  
合殆不可拘以常格如此日足可惜之類是  
也得韻窄則不復傍出而因見其巧愈嶮愈  
奇如病中贈張十八之類是也余嘗與聖俞  
語此以謂譬諸善馭良馬者通衢廣陌縱橫  
馳逐惟意所之至於曲水蟻封疾徐中節而  
不蹉跌乃天下之至工也聖俞戲曰前史言  
退之為人木強若覺韻可自足而輒傍出窄

韻難獨用而拗反不出非強而然歟坐客笑

此日足可惜此酒不足嘗捨酒去

一作須

相語共分一日

光念昔未知子孟君自南方自矜有所得言子有文章

我名屬相府欲往不得驤

一作行

思之不可見百端在中

腸維時月魄死冬日朝在房駢馳公事退聞子適及城

一作隍

命車載之至引坐於中堂開懷聽其說往往副所

望孔丘歿已遠仁義路久荒紛紛百家起詭怪相披猖

長老守所聞後生習為常少知誠難得純粹古已亡譬

彼植園木有根易為長留之不遣去館置城西旁歲時

來一作未

云幾浩浩觀湖湘

一作江湘

衆夫指之笑謂我知不

明兒童畏雷電魚鼈驚夜光州家舉進士選試繆所當

馳辭對我策章句何煒

一作煌

煌相公朝服立工席歌鹿

鳴禮終樂已闕相拜送於庭之子去須臾赫赫流盛名

切喜復竊歎

一作慷慨仍竊歎

諒知有所成人事安可恒奄忽

令我傷聞子高第日正從相公喪哀情逢吉語愴怳難

為雙暮宿偃師西展轉在空牀夜聞汴州亂繞壁行徬

皇我時留妻子倉卒不及將相見不復期零落甘所丁

驕女未絕乳念之不能忘忽如在我前

一作其側

耳若聞啼

聲中途安得返一日不可更俄有東來說我家免罹殃

乘船下汴水東去趨彭城從喪朝至洛

一作從喪至洛陽

旋

一作

還走不及停假道經盟津出入行澗岡日西入軍門羸

馬顛且僵主人願少留延入陳壺觴卑賤不敢辭忽忽

心如狂飲食豈知味絲竹徒轟轟平明脫身去決若驚

鳧翔黃昏次汜水欲濟

一作過

無舟航號呼久乃至夜濟



十里黃中流上灘渾

一作汝灘

沙水不可詳驚波暗合杳星

宿爭翻芒馬乏復悲鳴

一作馬躑躅悲鳴  
趙作轅馬躑軸鳴

左右泣僕童

甲午憩時門臨泉窺鬪龍東南出陳許陂澤平

一作何  
一作又作

路茫茫道邊草木花紅紫相低昂百里不逢人角角雉

雉鳴

一作雉  
一作鳴

行行二月暮乃及徐南疆下馬步隄岸上

船拜吾兄誰云經艱

一作險

難百口無夭殤

一作橫

僕射南

陽公宅我睢水陽篋中有餘衣盎中有餘糧閉門讀書

史風清窻戶涼

一作窻戶清風涼  
一作忽已涼  
一作風已涼

日念子來游子

豈知我情別離未為久辛苦多所經對食每不飽共言  
無倦聽連延三十日晨坐達五更我友一作二三子宦

游在西京東野窺禹穴李翱觀濤江蕭條千萬里會合  
安可逢淮之水舒舒楚山直叢叢子又捨我去我懷焉  
所窮男兒不再壯百歲如風狂高爵尚可求無為守一

鄉

病中贈張十八

中虛得暴下避冷臥北窻不蹋曉鼓朝安眠聽逢逢籍

也處間里抱能未施邦文章自娛戲金石日擊撞龍文  
百斛鼎筆力可獨扛談舌久不掉非君亮誰雙扶几導  
之言曲節初縱縱半途喜開鑿派別失大江吾欲盈其  
氣不令見麾幢牛羊滿田野解旆束空杠傾樽與斟酌  
四壁堆甕缸玄帷隔雪風照鑪釘明缸夜闌一作縱押  
闔哆口疎眉厖勢侔高陽翁坐約齊橫降連日挾所有  
形軀頓降肛將歸乃徐謂子言得無哢迴君一作與角  
逐斫樹收窮龐雌聲吐款要酒壺綴羊腔君乃崑崙渠

籍乃嶺頭瀧譬如蟻蛭微詎可陵崆峒幸願終賜之斬  
拔枿與椿從此識歸處東流水淙淙

聽穎師彈琴

西清詩話云三吳僧義海以琴名世六一居士嘗  
問東坡琴詩孰優東坡答以退之聽穎師琴公曰  
此祇是聽琵琶耳或以問海海曰歐陽公一代英  
偉然斯語誤矣昵昵兒女語恩怨相爾汝言輕柔  
細屑真情出見也畫然變軒昂勇士赴敵場精神

餘溢竦觀聽也浮雲柳絮無根蒂天地濶遠隨飛揚縱橫變態浩乎不失自然也喧啾百鳥羣忽見孤鳳凰又見穎孤絕不同流俗下俚聲也躋攀分寸不可上失勢一落千丈強起伏抑揚不主故常也皆指下絲聲妙處惟琴為然琵琶格上聲烏能耳邪退之深得其趣未易譏評也

許彥周詩話云退之聽穎師彈琴詩云浮雲柳絮無根蒂天地濶遠隨飛揚此泛聲也謂輕非絲重

非木也喧啾百鳥羣忽見孤鳳凰泛聲中寄  
指聲也躋攀分寸不可上吟繹聲也失勢一  
落千丈強順下聲也僕不曉琴聞之善琴者  
云此數聲最難工自文忠公與東坡論此詩  
作聽琵琶詩之後後生隨例云云柳下惠則  
可吾則不可故特論之少為退之雪寃

昵昵兒女語恩怨相爾汝畫然變軒昂勇士赴敵場浮  
雲柳絮無根蒂天地濶遠隨飛揚喧啾百鳥羣忽見孤

鳳凰躋攀分寸不可上失勢一落千丈強嗟余有兩耳

未省聽絲篁自聞穎師彈起坐在一牀一作旁推手遽止

之濕衣浹滂滂穎乎

一作師

爾誠能無以冰炭置我腸

盧郎中雲夫寄示送盤谷子詩歌以和之

東坡云退之尋常自謂不逮李杜至於昔尋

李愿向盤谷一篇獨不減子美

昔尋李愿向盤谷正見高崖巨壁爭開張是時新晴天  
井溢誰把長劍倚太行衝風吹破落天外飛雨白日灑

洛陽東蹈燕川食曠野有饋木蕨芽滿筐馬頭溪深不  
可厲借車載過水入箱平沙綠浪榜方口鴈鴨飛起穿  
垂楊窮探極覽頗恣橫物外日月本不忙歸來辛苦欲  
誰為坐令再往之計墮眇茫

一作渺茫  
一作渺芒

閉門長安三日

雪推書撲筆歌慨慷旁無壯士遣屬和遠憶盧老詩顛  
狂開緘忽覩送歸作字向紙上皆軒昂又知李侯竟不  
顧方冬獨入崔嵬藏我今進退幾時決十年蠢蠢隨朝  
行家請官供不報答無異雀鼠偷太倉行抽手版付丞



相不待彈劾還耕桑

同張籍遊曲江

蒼梧雜志云退之盡是直道更無斧鑿痕人多嫌退之律詩不工使魯直為之未必能得如是氣象唐人謂此四句可敵一部長慶集誠然  
漠漠輕陰曉自開  
青春白日映樓臺  
曲江水滿花千樹  
有底忙時不肯來

答張徹

筆墨間錄云劉侗云答張徹一詩尤奇麗梅  
花灑水一對極有風味

辱贈不知報我歌爾其聆首叙始識面次言後分形道  
路絲萬里日月垂十齡浚郊避兵亂睢岍連門停肝膽  
一古劍波濤兩浮萍清墨竄舊史磨丹注前經義苑手  
祕寶文堂耳驚霆暄晨躡露烏暑夕眠風櫺結友子讓  
抗請師我慙丁初味猶噉蔗逐通斯建瓴搜奇日有富  
嗜善心無寧石梁平佺佺沙水光泠泠乘枯摘野豔沈

細抽潛腥游寺去陟

一作登

巘尋徑

一作幽

返穿汀綠雲竹

竦竦失路麻冥冥淫潦忽翻野平蕪眇開溟防泄塹夜

塞懼衝城晝局及去事戎轡相逢且軍伶觥秋縱兀兀

獵晏馳駟駟從賦始分手

一作首

朝京忽同舫急時促暗

棹戀月留虛亭畢事駢傳馬安居守憲螢梅花灞水別

宮

一作官

燭驪山醒省選逮投足鄉賓尚推翎塵祛又一

摻淚背還雙熒洛邑得休告華山窮絕陘倚崑睨海浪

引袖拂天星日駕此迴轄金神所司刑泉紳拖脩白石

劍攢高青磴，蘇達拳跼梯。颯颯伶俦悔，狂一作往已咋指。

垂誠仍鐫銘，峨豸忝備列。伏滿愧分涇，微誠慕橫草。瑣力摧撞廷，疊雪走商嶺。飛波航洞庭，下險疑墮井。守官

類拘囹，荒餐茹獠蠱。幽夢感湘靈，刺史肅著蔡。吏人沸

蝗螟，點綴簿上字。趨蹌閣前鈴，賴其飽山水。得以娛瞻

聽紫樹彫斐，疊碧流滴玲。瓏映波鋪遠，錦插地列長屏。

愁狄酸骨死，怪花醉魂馨。潛苞絳實拆，幽乳一作孔翠毛

零。赦行五百里，月變三十冀。漸堦羣振鷺，入學誨螟蛉。

革甘謝鳴鹿壘滿暫罄鉞回回抱瑚璉飛飛聯鶴鷁魚  
鬣欲脫背虬精光照一作虬光 先照一作光 硯  
朝廷勤來得晤語勿憚宿寒廳

山石

集注云蘇內翰嘗與客遊南溪醉後相與解  
衣濯足因詠公此篇慨然知其所以樂而忘  
其在數百年之外因次其韻

見東坡集

山石犖确行徑微黃昏到寺蝙蝠飛升堂坐階新雨足

葩蕉葉大椀子肥僧言古壁佛畫好以火來照所見稀  
鋪床拂席置美飯疎糲亦足飽我饑夜深靜臥百蟲絕  
清月出嶺光入扉天明獨去無道路出入高下窮烟霏  
山紅澗碧紛爛漫時見松檜皆十圍當流赤足踏澗石  
水聲激激風吹衣人生如此自可樂豈必局束為人鞿  
嗟哉吾黨二三子安得至老不更歸

八月十五夜贈張功曹

集注云公與張署以貞元二十一年二月赦

自南方俱徙掾江陵至是俟命於郴而作是  
詩怨而不亂有小雅之風

織雲四卷天無河清風吹空月舒波沙平水息聲影絕  
一杯相屬君當歌君歌聲酸辭且苦不能聽終淚如雨  
洞庭連天九疑高蛟龍出沒狸鼯號十生九死到官所  
幽居默默如藏逃下牀畏蛇食畏藥海氣濕蟄重腥臊  
昨者州前槌大鼓嗣皇繼聖登夔臯赦書一日行萬里  
罪從大辟皆除死遷者追回流者還滌瑕蕩垢清朝班

金野史卷之七  
卷七  
州家申名使家抑坎軻祇得移荆蠻判司官卑不堪說  
未免捶楚塵埃間同時輩流多上道天路幽險難追攀  
君歌且休聽我歌我今與君豈殊科一年明月今宵多  
人生由命非由他有酒不飲奈明何

苦寒

集注云此詩意蓋有所諷猶訟風伯之吹雲  
而雨不得作也謂隆寒奪春序而肆其寒猶  
權臣之用事太昊之畏避則猶當國者畏權



臣取充位而已其下反覆所言無易此意其末  
謂天子哀無辜則望人主進賢退不肖使恩澤  
下流施及草木其愛君憂民之意具見于此

四時各平分一氣不可兼隆寒奪春序顛頊固不廉太  
昊施維綱畏避但守謙遂令黃泉下萌芽天句尖草木  
不復抽百味失苦甜凶飈攪宇宙鉞刃甚割砭日月雖  
云尊不能活烏蟾羲和送日出愜怯頻窺覘炎帝持祝  
融呵噓不相炎而我當此時恩光何由沾肌膚生鱗甲

衣被如刀鎌氣寒鼻莫鼻血凍指不拈濁醪沸入喉口  
角如銜箝將持匕箸食觸指如排籤侵鑪不覺暖熾炭  
屢已添探湯無所益何況續無縑虎豹僵穴中蛟螭死  
幽潛熒惑喪躔次六龍冰脫髯芒碣大包內生類恐盡  
殲啾啾窻間雀不知已微纖舉頭仰天鳴所願晷刻淹  
不如彈射死却得親魚燂鸞鳳苟不存爾因不在占其  
餘蠢動儔俱死誰恩嫌伊我稱最靈不能女覆苦悲哀  
激憤嘆五藏難安恬中宵倚牆立淫淚何漸漸天王哀

無辜惠我不顧瞻褰旒去耳續調和進梅鹽賢能日登  
御黜彼傲與儉生風吹死氣豁達如褰簾懸乳零落墮  
晨光入前簷雪霜頓銷釋土脈膏且黏豈徒蘭蕙榮施  
及艾與蒹日萼行鑠鑠風條坐檐檐天乎苟其能吾死  
意亦厭

李花

集注云此詩自夜領張徹投盧仝而下其所  
以狀李花之妙者至矣

平旦入西園梨花數株若矜夸旁有一株李顏色慘慘  
似含嗟問之不肯道所以獨繞百匝至日斜忽憶前時  
經此樹正見芳意初萌芽奈何趣酒不省錄不見玉枝  
攢霜葩泣然為汝下雨淚無由返旆羲和車東風來吹不  
解顏蒼茫夜氣生相遮冰盤夏薦碧實脆斥去不御慙其花  
當春天地爭奢華洛陽園死尤紛拏誰堆平地萬堆  
雪剪刻作此連天花日花赤色照未好明月暫入  
都交加夜領張徹投盧仝乘雲共至玉皇家長姬香御

四羅列縞裙練悅無等差靜濯明粧有所奉顧我未肯  
置齒牙清寒瑩骨肝膽醒一生思慮無由邪

詠燈花

集注云此詩極似少陵

今夕知何夕花然錦帳中自能當雪暖那肯待春紅囊  
裏排金粟釵頭綴玉蟲更煩將喜事來報主人公

竹莊詩話卷七

欽定四庫全書

竹莊詩話卷八

韓退之下

城南聯句

劉貢父云東野與退之聯句宏壯辨博似出一手

竹影金鎖碎

郊

泉音玉淙琤瑠璃剪木葉

愈

翡翠開園

英流滑隨仄步

郊

搜尋得深行遙岑出寸碧

愈

遠日增

雙明乾穗紛拄地

郊

化蟲枯揭莖木腐或垂耳

愈

草珠

兢駢晴浮虛有新斲郊摧杙饒孤撐蟲飛粘網動愈雀

啁接彈驚脫實自開坼郊牽柔誰繞縈禮鼠拱而立愈

駉牛躅且鳴蔬甲喜臨社郊田毛樂寬征露螢不自暖

愈凍蝶尚思輕宿羽有先曉郊食鱗時半橫菱翻紫角

利愈荷折碧圓傾楚膩鱸鮓亂郊獠羞螺螯并桑蠖見

虛指愈穴狸聞鬪獍逗翳翅相築郊擺幽尾交撈蔓涎

角出縮愈樹啄頭敲鏗脩箭裊金餌郊羣鮮沸池羹岸

殼拆玄兆愈野蕤漸豐萌窰烟冪疏島郊沙篆印回平



瘁肌遭眊刺愈 啾耳間雞生奇慮恣迴轉郊 遐晷縱逢

迎巔林戢遠睫愈 縹氣夷空情歸迹歸不得郊 捨心捨

還爭靈麻撮狗蚤愈 村雉啼禽猩紅皺曬簷瓦郊 黃團

繫門衡得雋蠅虎健愈 相殘雀豹趁束枯樵指禿郊 刈

熟擔肩頰溢旋皮卷鬻愈 苦開腹膨臍機春潺湲力郊

吹簸飄飄精賽饌木盤簇愈 鞞妖藤索緝荒學五六卷

郊 古藏三四瑩里儒拳足拜愈 土怪閃眸偵蹄道補復

破郊 絲窠掃還成暮堂蝙蝠沸愈 破竈伊威盈追此訊

前主郊答云皆冢卿敗壁剝寒月愈折篁嘯遺笙桂熏

霏霏在郊綦迹微微呈劔石猶竦檻愈獸材尚拏楹寶

唾拾未盡郊玉啼墮猶鎗牕綃疑閔艷愈粧燭已銷繁

綠髮抽珉甃郊青膚聳瑤楨白蛾飛舞地愈幽蠹落書

棚惟昔集嘉詠郊吐芳類鳴鸞窺奇摘海異愈恣韻激

天鯨腸胃繞萬象郊精神驅五兵蜀雄李杜拔愈嶽力

雷車轟大句幹玄造郊高言軋霄崢芒端轉寒燠愈神

助溢杯觥巨細各乘運郊湍溷亦騰聲凌花咀粉藻愈

削縷穿珠櫻綺語洗晴雪郊嬌辭哢雛鶯酣歡雜弁珥

愈繁價流金瓊菡萏寫紅調郊姜蕤綴藍瑛庖霜膾玄

鯽愈浙玉炊香粳朝饌已百態郊春醪又千名哀匏感

駛景愈冽唱凝餘晶解魄不自主郊痺肌坐空曠扳援

賤蹊絕愈炫曜仙選更叢巧競採笑郊駢鮮互探嬰桑

變忽蕪蔓愈樟裁浪登丁霞鬪詎能極郊風期復誰賡

臯區扶帝壤愈瓌蘊郁天京祥色被文彥郊良材插杉

攄隱伏饒氣象愈興潛示堆坑擘華露神物郊擁終儲

地禎訂謨壯締始

愈

輔弼登階清坐秀恣填塞

郊

呀靈

瀋停澄益大聯漢魏

愈

肇初邁周嬴積照涵德鏡

郊傳

經儷金蠶食家行鼎鼎

愈

寵族飫弓旌弈制盡從賜

郊

殊私得逾程非橋上架漢

愈

繚岸俯窺瀛瀟碧遠逾委

郊湖嵌費攜擎荀首從大漠

愈

楓楮至南荆嘉植鮮危

郊朽膏理易滋榮懸長巧紐翠

愈

象曲善攢珩魚口星

浮沒

郊

馬毛錦班駢五方亂風土

愈

百種分鋤耕葩孽

相妬出

郊

菲葺共舒情類招臻侗詭

愈

翼萃伏衿纓危

望跨飛動郊冥升躡登閣春游轢霍靡愈彩伴颺嫵嬪

遺祭飄的爍郊淑顏洞精誠嬌應如在寤愈顏意若舍

醒鵝毳翔衣帶郊鵝肪截珮璜文升相照灼愈武勝屠

攬搶割錦不酬價郊構雲有高營通波刃鱗介愈疏畹

富蕭衡買養訓孔翠郊遠苞樹蕉拚鴻頭排刺芡愈鵠

殼攢瓌橙鴛廣雜良牧郊蒙休賴先盟罷旄奉環衛愈

守封踐忠貞戰服脫明介郊朝冠飄彩紘爵勳逮僮隸

愈簪笏自懷繡乳下秀嶷嶷郊椒蕃泣惶惶貌鑑清溢

匣愈眸光寒發研館儒養經史郊綴戚觴孫甥考鐘饋

肴核愈戛鼓侑牢牲飛膳自北下郊函珍極東烹如瓜

煮大卵愈比線茹芳菁海嶽錯口腹郊趙燕錫媯姪一

笑釋仇恨愈百金交弟兄貨至貊戎市郊呼轉鸚鵡令

順居無鬼瞰愈抑橫免官評殺候肆凌翦郊籠原市置

紉羽空顛雉鷄愈血路迸狐麋折足去蹠蹕郊感髻怒

鬢鬢躍犬疾翦鬢愈呀鷹甚饑虫算蹄記功賞郊裂腦

擒撻振猛斃牛馬樂愈妖殘梟鴿悖窟窮尚嗔視郊箭

出方驚擘連箱載已實愈礙轍棄仍羸喘覩鋒刃點郊

困衝株枿盲掃淨豁曠曠愈騁遙畧革革饒扱飽活鬻

郊惡嚼嘔腥鯖歲律及郊至愈古音命韶諷旗旆流日

月郊帳廬扶棟薨磊落奠鴻壁愈參差席香萸玄祇社

兆姓郊黑拒饑豐盛慶流蠲瘥癘愈威暢捐輶朝靈燔

高望回郊龍駕聞鼓颺是惟禮之盛愈永用表其宏德

孕厚生植郊恩熙完別剝宅土盡華族愈連田間強吐

蔭庾森嶺檜郊啄場翹祥鵬畦肥剪韭薤愈陶固收盆

盟利養積餘健

郊

孝思事嚴祊  
掘雲破嶸

愈

采月流

均泓寺砌上明鏡

郊

僧孟鼓曉鈺  
泥像對騁怪

愈

鐵鐘

孤春鎖瘿頸  
鬧鳩

郊

蜿蜒亂蛛  
甚黑老蠶蠋

愈

麥

黃韻鸚鵡韶曙  
遲勝賞

郊

賢明戒先庚  
馳門填偈仄

愈

鏡墅輾砢碎  
醉結紅滿杏

郊

稠凝碧浮錫  
躡繩覲娥婺

愈

鬪草擷璣珵  
粉汗澤廣額

郊

金星墮連瓔  
鼻偷困淑

愈

郁眼剽強盯  
睇是節飽顏色

郊

茲疆稱都城  
書饒罄

魚繭

愈

紀盛播琴箏  
奚必事遠覲

郊

無端逐羈僮  
將身



親翹魅愈浮迹侶鷗鵲腥味空莫屈郊天年徒羨彭驚

魂見蛇蚓愈觸鯁值蝦蟇幸得履中氣郊忝從拂天棖

歸私暫休暇愈驅明出庠鬻鮮意竦輕暢郊連輝照瓊

瑩陶暄逐風乙愈躍視舞晴蜻足勝自多詒郊心貪敵

無勅始知樂名教愈何用苦拘停畢景任詩趣郊焉能

守磴磴愈

會合聯句

黃魯直云會合聯句四君子皆佳士意氣相

入雜然成文章世之文章之士少聯句蓋筆  
不能相追或成四公子碁耳

離別言無期會合意彌重籍病添兒女戀老喪丈夫勇

愈劍心知未死詩思猶孤聳郊愁去劇箭飛歡來若泉

涌徹析言多新貫攄抱無昔壅籍念難須勤追悔易勿輕

踵愈吟巴山犖學說楚波堆壘郊馬辭虎豹怒舟出蛟

鼉恐徹狂鯨時孤軒幽狽雜百種愈瘴衣常腥膩蠻器

多疎冗籍剥苔弔斑林角飯餌沈冢愈忽爾銜遠命歸

歟舞新寵郊鬼窟脫幽妖天居覲青拱愈京遊步方振

謫夢意猶恂籍詩書誇舊知酒食接新奉愈嘉言寫清

越瘡病失肱腫郊夏陰偶高庇宵魄接虛擁愈雪絃寂

寂聽茗盃纖纖捧郊馳輝燭浮螢幽響泄潛蠶愈詩老

獨何心江疾有餘虺郊我家本溼穀有地介臯輦休迹

憶沈冥峨冠慙闌罨愈升朝高轡逸振物羣聽悚徒言

濯幽泌誰與薤荒茸籍朝紳鬱青綠馬飾曜珪珙國讎

未銷鑠我志蕩邛隴郊君才誠侗時論方洵溶格言

多彪蔚懸解無枯拳張生得淵源寒色拔山豕堅如撞  
羣金眇若抽獨蛹愈伊余何所擬跛鼈詎能踊塊然墮  
岳石飄爾胃巢毳郊龍旆垂天衛雲韶凝禁甬君胡眠  
宴然朝鼓聲洶洶愈

鬪雞聯句

集注云公與東野聯句詞意雄渾極其情態  
間以人才為喻兩皆傑作真歐陽文忠所謂  
韓孟於文詞兩雄力相當者也至若爭觀雲

填道助叫波翻海則公詩之豪而一噴一醒  
然再接再礪乃則東野工處

大雞昂然來小雞竦而待愈崢嶸顛盛氣洗刷凝鮮彩

郊高行若矜豪側睨如同殆愈精光目相射劒戟心獨

在郊既取冠為胄復以距為鐵天時得清寒地利挾爽

塏愈磔毛各噤瘁怒癭爭硯磊俄膺忽爾低植立瞥而

改郊膈膊戰聲喧續翻落羽矐中休事未決小挫勢益

倍愈妬腸務生敵賊性專相醢裂血失鳴聲啄殷甚饑

餒

郊

對起何急驚隨旋誠巧給毒手飽李陽神槌困朱

亥

愈

惻心我以仁碎首爾何罪獨勝事有然旁驚汗流

浼

郊

知雄欣動顏怯負愁看賄爭觀雲填道助叫波翻

海

愈

爭爪深難解嗔晴時未怠一噴一醒然再接再礪

乃

郊

頭垂碎丹砂翼搨拖錦綵連軒尚賈餘清厲比歸

凱

愈

選俊感收毛受恩慙始隗英心甘鬪死義肉恥庖

宰君看鬪雞篇短韻亦可採

郊

和虢州劉給事君三堂二十一詠

號州刺史宅連水池竹林往往為亭臺島渚目其  
處為三堂劉君自給事中出刺此州在任逾歲職  
修人治州中稱無事頗復增飾從子弟而遊其間  
又作二十一詩以詠其事流行京師文士爭和之  
予與劉善故亦同作

筆墨間錄云三堂二十一詠取韻精切非復  
縱肆而作隨其題觀之其工可知也

新亭

湖上新亭好公來日出初水紋浮枕簟瓦影蔭龜魚

流水

汨汨幾時休從春復到秋祇言池未滿池滿強交流

竹洞

竹洞何年有公初斫竹開洞門無鎖鑰俗客不曾來

月臺

南館城陰濶東湖水氣多直須臺上看始奈月明何

渚亭



自有人知處那無步往蹤莫教安四壁面面看芙蓉

竹溪

藹藹溪流漫稍稍岸篠長穿沙碧簾淨落水紫袍香

北湖

聞說遊湖棹尋常到此迴應留醒心處準擬醉時來

花島

蜂蝶去紛紛香風隔岸聞欲知花島處水上覓紅雲

柳溪

柳樹誰人種行行夾岸高莫將條繫纜著處有蟬號

西山

新月迎宵掛晴雲到晚留為遮西望眼終是懶回頭

竹徑

無塵從不掃有鳥莫令彈若要添風月應除數百竿

荷池

風雨秋池上高荷蓋水繁未諳鳴撼撼那似卷翻翻

稻畦

羅布畦堪數枝分水莫尋魚肥知已秀鶴沒覺初深

柳巷

柳巷還飛絮春餘幾許時吏人休報事公作送春詩

花源

源上花初發公應日日來丁寧紅與紫慎勿一時開

北樓

郡樓乘曉上盡日不能迴晚色將秋至長風送月來

鏡潭

非鑄復非鎔泓澄忽此逢魚蝦不用避祇是照蛟龍

孤嶼

朝遊孤嶼南暮戲孤嶼北所以孤嶼鳥與君盡相識

方橋

非閣復非船可居兼可過君欲問方橋方橋如此作

梯橋

乍似上青冥初疑躡菡萏自無飛仙骨欲度何由敢

月池

寒池月下明新月池邊曲若不妬清妍却成相映燭

柳子厚

東坡云蘇李之天成曹劉之自得陶謝之超然固  
已至矣而杜子美李太白以英偉絕世之資凌跨百  
代古之詩人盡廢然魏晉以來高風絕塵亦少衰矣  
李杜之後詩人繼出雖有遠韻而才不逮意獨韋應  
物柳子厚發纖濃于簡古寄至味于淡泊非餘子所  
及也唐末司空圖崎嶇兵亂之間而得詩人高雅猶

有承平之遺風其論詩曰梅止于酸鹽止于鹹飲食不可無鹽梅而其美常在于鹹酸之外可以一唱而三嘆也子厚詩在陶淵明下韋蘇州上退之豪放奇險則過之而溫麗靖深不可及也所貴于枯淡者謂外枯而中膏似淡而實美淵明子厚之流是也若中外皆枯亦何足道佛言譬如食蜜中邊皆甜人食五味知其甘苦者皆自能分別其中邊者百無一矣詩眼云子厚詩尤深遠難識前賢亦未推重自老坡

發明其妙學者方漸知之余嘗問人柳詩何好答云大體皆好又問君愛何處答云無不愛者便知不曉矣識文章者當如禪家有悟門夫法門百千差別要須自一轉語悟入如古人文章直須先悟得一處乃可通其他妙處

韓子蒼云淵明詩惟韋蘇州得其清閒尚不得其枯淡柳州獨得之但恨其少道爾柳詩不多體亦備衆家惟效陶詩是其性所好獨不可及也

酬韶州裴長使二十韻韶州幸以詩見及往復  
奇麗邈不可慕用韻尤為高絕余因拾其餘韻  
酬焉凡為韶州所用者置不取其聲律言數如  
之

筆墨間錄云韶州裴使君二十韻尤見奇險  
之功蓋山字不比遐字之多也

遐字乃增至  
八十韻詩

金馬嘗齊入銅魚亦共頒疑山看積翠湏水想澄灣標  
榜同驚俗清明兩照姦乘輅參孔僅按節服侯冊賈傅



辭寧切虞童髮未鬣秉心方的騰口任嘖嘖聖理高  
懸象爰書降罰鍤德風流海外和氣滿人寰禦魅恩猶  
貸思賢淚自潛存亡均寂寞零落間惇鯨夙志隨憂盡  
殘肌觸瘡瘡月光搖淺瀨風韻碎枯管海俗衣猶卉山  
夷髻不鬣泥沙潛虺域榛莽鬪豺獍循省誠知懼安排  
只自憫食貧甘莽鹵被褐謝爛編遠物裁青麩時珍饌  
白鷗長捐楚客珮未賜大夫環異政徒云仰高蹤不可  
攀空勞慰顛顛妍唱劇妖嬈

晨詣超師院讀禪經

詩眼云子厚晨詣超師院讀禪經詩一段至誠潔清之意參然在前真源了無取妄迹世所逐遺言冀可冥繕性何由熟真妄以喻佛理言行以盡薰修外此亦無詞矣道人庭宇靜苔色連深竹葢遠勝竹逕通幽處禪房花木深日出霧露餘青松如膏沐子家舊有大松偶見露洗而霧披真如洗沫未乾染以翠色然後知此語

能傳造化之妙澹然離言說悟悅心自足蓋言  
因指而見月遺經而得道於是終焉其本末立  
意遣詞可謂曲盡其妙無毫髮遺恨耳

汲井漱寒齒清心拂塵服閒持貝葉書步出東齋讀真  
源了無取妄迹世所逐遺言冀可冥繕性何由熟道人  
庭宇靜苔色連深竹日出霧露餘青松如膏沐澹然離  
言說悟悅心自足

南澗中題

東坡嘗題此詩後云子厚南遷後詩清勁紆  
徐大率類此又云南澗詩憂中有樂樂中有  
憂益絕妙古今

筆墨間錄云南澗詩平淡有天工在與崔策  
登西山詩上語奇故也

秋氣集南澗獨遊亭午時迴風一蕭瑟林影久參差始  
至若有得稍深遂忘疲羈禽嚮幽谷寒藻舞淪漪去國  
魂已遠懷人淚空垂孤生易為感失路少所宜索寞競

何事徘徊只自知誰謂後來者當與此心期

巽公院五詠

筆墨間錄云巽公院五詠取韻精切非復縱肆而作隨其題觀之其工可知也

淨土堂

結習自無始淪溺窮苦源流形及茲世始悟三空門華堂開淨域圖像煥且繁清冷焚衆香微妙歌法言稽首愧導師超遙謝塵昏

曲講堂

寂滅本非斷文字安可離曲堂何為設高士方在斯聖  
默寄言宣分別乃無知趣中即空假名相與誰期願言  
絕聞得忘意聊思惟

禪室

發地結菁茆團團抱虛白山花落幽戶中有忘機客涉  
有本非取照空不徒析萬籟俱緣生窅然喧中寂心境  
本同如飛鳥無遺迹

芙蓉亭

新亭俯朱檻嘉木開芙蓉清香晨風遠溽彩寒露濃瀟  
灑出人世低昂多異容嘗聞色空喻造物誰為工留連  
秋月晏迢遞來山鍾

苦竹橋

危橋屬幽徑繚繞穿疎林迸籜分苦節輕筠抱虛心俯  
瞰涓涓流仰聆蕭蕭吟差池下烟日嘲啗鳥山禽諒無  
要津用棲息有餘音

田家

筆墨閒錄云田家詩雞鳴村巷白云云又里  
胥夜經過云云絕有淵明風味

蓐食徇所務驅牛向東阡雞鳴村巷白夜色歸暮田札  
札耒耜聲飛飛來鳥鳶竭茲筋力事持用窮歲年盡輸  
助徭役聊就空自眠子孫日已長世世還復然

籬落隔烟火農談四隣夕庭際秋蟲鳴疎麻方寂歷蠶  
絲盡輸稅機杼空倚壁里胥夜經過雞黍事筵席各言



官長峻文字多督責東鄉後租期車轂陷泥澤公家少  
推恕鞭扑恣狼籍努力慎經營肌膚真可惜迎新在此  
歲唯恐踵前迹

梅雨

筆墨間錄云此詩不減老杜

梅實迎時雨蒼茫值晚春愁深楚猿夜夢斷越雞晨海  
霧連南極江雲暗北津素衣今盡化非為帝京塵

楊花白

許彥周詩話云子厚樂府楊花白言婉而情  
深古今絕唱也

楊花白風吹度江水坐令宮樹無顏色  
搖蕩春光千萬里茫茫曉日下長秋哀歌未斷城鷓起

漁翁

冷齋夜話云東坡云詩以奇趣為宗反常合  
道為趣熟味此詩有奇趣

漁翁夜傍西巖宿曉汲清湘燃楚竹  
烟銷日出不見人

款乃一聲山水淥回看天際下中流崑上無心雲相逐  
飲酒

筆墨間錄云飲酒詩絕似淵明

今旦少愉樂起坐開清樽舉觴酌先酒

始為酒者也

為我驅

憂煩須臾心自殊頓覺天地暄連山變幽晦淥水涵晏  
溫藹藹南郭門樹木一何繁清陰可自庇竟夕聞嘉言  
盡醉無復辭偃臥有芳蓀彼哉晉楚富此道未必存

江雪

洪駒父詩話云東坡言鄭谷詩江上晚來堪  
畫處漁人披得一蓑歸此村學中詩也子厚  
云云信有格也哉殆天所賦不可及也

千山鳥飛絕萬逕人蹤滅孤舟蓑笠翁獨釣寒江雪

同劉二十八哭呂衡州兼寄江陵李元二侍御

詩眼云哭呂衡州詩足以發明呂溫之後偉哭凌  
員外詩書盡準平生掩役夫張進骸既盡役夫之  
事又反覆自明其意此一篇筆力規模不減莊周

左丘明也

衡嶽新摧天柱峯  
士林憔悴泣相逢  
祇今文字傳青簡  
不使功名上景鐘  
三畝空留懸磬室  
九原猶寄若堂封  
遙想荊州人物論  
幾回中夜惜元龍

哭連州凌員外司馬

廢逐人所弃  
遂為鬼神欺  
才難不其然  
卒與大患期  
凌人古受氏  
吳世夸雄姿  
寂寞富春水  
英氣方在斯  
六學誠一貫  
精義窮發揮  
著書逾十年  
幽蹟靡不推  
天庭挾

高文萬字若波馳記室征西府宏謀耀其奇輜軒下東  
越列郡蘇疲羸宛宛凌江羽來棲翰林枝孝文留弓劍  
中外方危疑抗聲促遺詔定命由陳辭徒隸肅曹官征  
賦參有司出守烏江許左遷湟水湄高堂傾故國葬際  
限囚羈仲叔繼幽淪狂叫唯童兒一門既無主焉用徒  
生為舉聲但呼天孰知神者誰泣盡目無見腎傷足不  
持溘死委炎荒臧獲守靈帷平生負國譴骸骨非敢私  
蓋棺未塞責孤旒凝寒颶念昔始相遇肺腑為君知進

身齊選擇失路同瑕疵本朝濟仁義今為衆所嗤滅名  
竟不試世義安可知恬死百憂盡苟生萬慮滋顧余九  
逝魂與子各何之我歌誠自慟非獨為君悲

掩役夫張進骸

生死悠悠爾一氣聚散之偶來紛喜怒奄忽已復辭為  
役孰賤辱為貴非神奇一朝續息定枯朽無妍媸生平  
勤皂櫪剝秣不告疲既死給轡犢葬之東山基奈何值  
崩湍當折臨路陞髡然暴百骸散亂不復支從者幸告

余睽之涓然悲猫虎獲迎祭犬馬有蓋帷佇立唁爾魂  
豈復識此為畚插載埋瘞溝瀆護其危我心得所安不  
謂爾有知掩骼著春令茲焉適其時及物非吾輩聊且  
顧爾私

竹莊詩話卷八